



09972

黃石齋先生集卷九

明黃道周著

獄中與張煙叔書

張汰沃見幾太蚤令吾血淚無飛迸處古人於仁義爛時自裹血肉今於血肉爛時自裹仁義悠悠命也誰爲談者高臺曲池雄疆廣宇似指顧間灰塵上事恨三十餘不追巢許之蹤捧喬松之足耳傳者并云天意已回而梅眼未放魚縣歎檻古今同嗟獄中四十縉紳不如煙叔一老布衣遠矣破涕加餐千福萬福

羈庫中寄魏秉德書

臨別江渚四顧黯然征鳥厲疾不復縈懷惟送遠將歸聞關跋涉增其愁歎耳行後羣奸情露三輔坐敗事可稍申而入都之時攻楊者四起誦經殺蝗動盧牧州之疏而葉潤山又有救章明廷以乾坤正氣集

卷五百十六

一

把持爲疑銷金發於典午穿溜積於平時木朽蠹生宜其然也後聖明微有悔端而綸扉諸臣反唇猶昔前此四月召諸詹翰垂涕錦州之戒四十諸賢無一人發聲而陳井研以阻人啟口爲長壽所庇牽連入閣從此當宁確然以爲當辜雖睨雪欲消而風霆不改矣九月中有以祿署推倩翁者已啟事而當道又爲品級不對停其起草不審此後當復如何前此蔣八公諸公頗其留心比以資深詹翰將散各部堂及爲開府遂抱頭依簷仰面無復饒慮矣楚事敗壞不可言賀李兩將叛爲秦賊武陵諉罪於秦蜀閉門誦經不知究竟何似明廷赫然爲誅舊督繫新撫膠關內道卒無有善其後遼督又與○相持就餉甯遠而爲錦州諸○所斷東西不能相及畿南齊豫之問餓賊蠱起旅道不通治平威令獨行於守道縉紳及狂狴鐵門之內耳倩翁不知何時發旆想近時別有

啟事滑縣亦持重不能直達計此時禹稷亦與顏老同功聞雞擊楫使人心倦也前親友斂贈已屢書力辭而家人持之不審又堆積以累行旅良可畏心今幸抵都而吳郁翁困於草場盡爲請貸乃知賢者謀慮萬里不爽藉此異日可復反璧知秉德兒能爲親翁綱紀之也

### 與張玉笥書

玉笥年翁承教又兩月甯遂寂寂耶世事尙可爲天命已有屬年翁以方盛之年膺非常之寄生多事之邦處兩疑之地能乘雲弄鳳翩然高舉者則不俟擇木而栖耳若猶是筍鞭出地未能果自遐逸也顧榮謂張翰曰有當世之望者以自退固爲難弟生海隅又以息陰島外而兵革所徵無遠不屆又近爲輦轂一丘一壑無安枕處是以皇皇若此約與年翁會於江上而方盤石未有其事乾坤正氣集卷五百十六

二

之意金正希望救甚殷是以決意西行今新安已破事勢愈難弟獨掌隻身無一援者樂毅田單遂爲古今絕物荷蕢石門又恐不免披髮年翁何以教之弟兵不多不能分出四路管仲九合年翁已得一升能以精良濟我夜飯乎履端已屆元始將新咫尺之箋幸蚤自貢是吾兄弟惓惓之懷逾於促膝也江右諸賢藉台翁鼓吹新安諸賢聲勢必合倚杖而聽詔書不獨伯魚開其尊曠也仰望教誨渴於苗雲

### 答林子篤書

捧書垂念眞至拜誅章益重風雨雞鳴之感日市數升米何止丙辰之時今斗米五十錢家廿餘口日需百廿錢雖兩君平垂簾不能望子雲之腹何況帶索枯魚搖木之間乎憶老母在時每道羅一峯客至過午不得飯又云莆中陳蓋臣常兩日斷炊以此爲戒

不肖常笑以爲戲談今便當眞也似此口腹長以累人遂使閔仲  
赫頭貴於琴瑟嚮聞兄體稍佳爲慰今見書知霍然良可不孝與  
空乏相宜絕粒七日亦偶然耳不復慮及倏忽居諸如以爲毀者  
是曾參所致飢於孔伋也家表弟日前已至館想蚤晚間晤慰來  
賜甚謝酒棗是取之縣中者無所事已拜米雞甚勞伴信九月朔  
節哭謝謝不悉所懷

與子庸兄書

鮮民何足念誦皋魚之言釋季路之訓仰視梧椽徒自隕淚耳兄  
翁愛惠無已去歲所貽爲老母目覩不敢復陳今柰何從酸楚中  
接華美之玩乎昔人含憂方之吞炭道周夷然如噉杵曰耳桃核  
棗花宜未敢問也廣眞兄晤對日新西南寶氣自映斗下每想名  
賢可道胸臆者如兄翁叔姪相與自是夙緣寸楮數行宛然如鏡  
乾坤正氣集卷五百十六

三

與劉魚公書

生德之章去耳猶盈登堂之歡盟心未遠而僕忘其白華自抽宿  
莽旣乏八韻以和兮風仍缺九拜以敦誼素雖一時愧集驚還叱  
牛之聲實千仞罪深難聞應鶴之節也侵晨而出忽適他緣祇今  
自籌不審何故始信貧賤之腸難爲仁義抑將姻婭之好不及友  
朋寤寐抱慙家人譙讓昏昏此懷洵爲難白矣蚤致拜又不晤諸  
兄弟何時荆袒會此良期

與劉魚公書

長安晨夕結想閉目惟省禍過日爲幸墓草未齊丙舍頽圯吾爲此羈縻兩腋不生言念唯有愁歎擬一疏請歸倪李二兄爭執不可不知何時得遂初志但幸主上聖明臣言盡用某一官何論乎京畿桂玉介石無交家僮婢女作古人饗殮但有愠見之色四顧無力悠泛難親唯兄堅精可冀倘總帳稍撤蒯緱就道或一至都門微解憂結吾便促一歸路與兄攜手徐淮作浮家泛宅故事勝如坐籠中莫放也風雪愁人尙祈晤言伊邇

與陳無涯無技書

無涯無技念吾良苦舍現成之顏閔圖未就之管葛卽使事集無益秋毫偶爾蹉跎則所喪已山謂之何哉前月已五疏趣歸而苦不得便造船放海欲坐岸嘯歌知其難矣我明與周室同厯非唐季所望衰軼而後猶爲戰國春秋今天子英武聰明同符高祖又乾坤正氣集卷五百十六

四

有四同與南陽相嬾業已從事無拔身之理但此寤夢刻刻在東郭北山唯兄弟知我情苦七月廿二日已奉朝餞克復神州如此重擔何時到家兄弟無可相助當勸人輸誠速期共濟亦仲尼所嘆微管孟子所慨纓冠也監諒千千不盡

與吳廣眞書

廣眞兄契三百里過此乃不信宿雖有盈門不如蓬室矣春計誠殷然如兄芝田豈須耘鋤乎前旌發俱健力都不及致草草附上此數日雨微下弟方出肅容使行苦迅便不詳書鵬搏信近便此促勝也

與吳廣眞書

山鬼有窮老僧無盡從此進之佛力神通猶是魔境吾兄精進忍辱不孝默地混沌施之宙合無復不可也明晨似當過龍嶺抑遲

之後從屐齒後慧乎

與金將軍書

金大將軍麾下聞麾下駐豫章號令嚴明賢良諸家烽火不及彼中來者咸稱麾下未覩明詔欲藉雄勝爲恢復之端似矣今天子神武江楚雨粵暨於吳會紳弁歸心不日親征誦江漢常武之詩想亦麾下之所樂聞也諸老有習麾下者皆云忠孝出自天性權變準於時宜以不佞觀之天意已還物極必反□□痛穢刻於人心明家渥澤尙留天下麾下必欲豎旂常之勳垂鍾鼎之業則今其時也永勝伯師下贛州萬吉人師出杉關二君雖與麾下相知然至旗鼓相當拔旃不武以不佞之意欲借健士出九江操舟東下掃甯國宣城之□於勢甚便於朝廷甚忠於勲業甚大高皇在天寶式臨之唐人有云舍十七葉天子不事而事□□固豪傑所乾坤正氣集卷五百十六

五

不爲也唯大將軍留意渴冀懷音

與金將軍書

金大將軍麾下自先數年仰慕芳猷以爲古臧馬之倫需時而興者及先朝蕃錫加以討逆之命僕謂曲阿孫郎復起於今卽五鎮四藩不足稱也比見松滋王稱麾下生平慕義慷慨激烈或有感憤圖一得當爲朝廷之用決非落落苟且生活者僕思念欲吐一言久矣凡三遣使過撫州爲永甯王所斷悠悠道路誰明此心今天子英武明博在高光之間得麾下佐之亘掃□□廓清海甸雖古之田疇朱序何足多乎人生駒隙藉竹帛以自老既有竹帛之榮又有鍾鼎之實雖有道仁人猶或爲之隗囂公孫述有何足師天下垂平□□已極明家之祚尙二百餘年僕不憚出山起而佐之先生何憚不用反手之力成千秋之業耶僕輩書生百不足談

所用區區布其伊鬱者非獨黎獻其仰和平亦執手追歡出明天子意也

### 與金將軍書

前有再書恣思麾下想見之矣王常下江亦是賢者何必隗述乃自爲豪如其翻然便當褰裳濡足與麾下共挽江河而洗石頭之穢以麾下之才垂名竹帛坐勒鐘鼎運掌耳乃栖栖出匹磾張軌之下可歎也不肖拏舟十數日將過星子以濯龍關麾下能出三千人相從雖萬戶侯豈足道哉詩曰爾公爾侯逸豫無期又曰反是不思亦已焉哉唯麾下千萬留意留意千萬

### 招征書

月前一再致書想皆達記室矣新主以高光之才合殷宗之學禮樂征伐規摹隨手文章性道非凡所聞也台翁起於南陽仲華山乾坤正氣集

卷五百十六

六

桑不足爲踰伯仲伊呂指揮蕭曹行於台翁見之留都握手遂合風雲此段精神亦自不偶但不知鍾山孝陵今復何似晉宋之禍豈吾輩之所忍聞挽回無術匡救無時緬想昔賢惟有頓足生平羞談管晏今日見侃嶠琨逖亦有慙色每聞秋風思一奮翼濯足龍江之上恨不能促膝招機部晉卿二三兄弟與台翁左右摩其旗鼓耳錢塘道阻日有訛言秣陵動靜常如寤夢王郎子輿誠不足驚而吳越豪傑未有來者不知台翁何以教之緩則失時急則促節蚤晚思仗義聲以收勇實藉台翁之靈西出杉關北出金闕東聯海道□□□□盱江建昌之間□□□□想不足以膏黃鉞也乞夫俱未決計幡舊俱有攢眉必得一當使昆陽無戰益子坐消非弟自走浙西收合吳會終是道謀潰成耳閩處囊中况俱鈍雖穎末不見温台上下雖俱歸誠未有定著必令陳夏起於雲間

楊劉發於臨吉張祁應於金華錢徐動於繡水則連雞難飛歲月  
易邁矣

與劉魚公書

聞魚公甚軼軻都是周罪過想知長安信行止不定故不得翻然  
遂來今浪浪當如何結局周最不解世情大約橋上是道家所惟  
吾輩人只須空山看灰燒火決然持此骨頭博浪不得也古韃以  
來不復知公家諸事參疏既非本名想無害今無緣見祁公談之  
韓魏公不識王荆老趙清獻不識周濂溪自是動靜頓殊匪關意  
緒迥別然如宋人端坐摹索喜怒哀樂未爲呆死也周出山來雖  
無豎立於朝家亦無所負蚤晚冀得開籠承矢空山無復風燭之  
意近乃悟諸丹訣自希夷以還未有悟其歎曲者意欲借棲雲一  
庵自築丹室募親友共鑄丹井不過費二三百金假三年之力仰  
乾坤正氣集

卷五百十六

七

視蒼旻俯接龍鶴不爲遠矣世事悠悠無一足語有意之倫俱嬰  
物網濕浸燥焚固其所也長安儻舍之外煤米便乏又諸種書悉  
寔常浙爲腹爲目了無一可知只決不能來卽來此間亦無游郊  
鳴珂之樂徒賦嘆而已風波細軟久當自平不足望意十一月九  
日黃道周頌首

與黃東崖相國書

聞誰駕吉旋已踰月矣百里瞻言千載勝事周獨以溝壑輾轉不  
得申摧秣之懷惆悵何極日前拜曹司李書乃知姚永言寄信昨  
拜台緘又得劉丁書非閣下垂念無已何以得此於朋儕緬念往  
時顛連寢食唯有揮涕幸藉月骨反首邱隴爲願踰涯又安敢聞  
人動靜去臘墮身百尺之崖眩膝垂折今稍稍蘇神理氣志亦覺  
頓盡暗閣下書復生蒲柳之色耳漳南道梗行李少通勦撫兩字

迄無定算周納足箚中藏頭被裏但知牀几井竈各自有命了不  
動其經營也正月二十日寇迫漳郡賤體委頓自分焦廬已託野  
火之下恐出處未明已勸小疏哀請不敢上質知已卽有不測亦  
當以理數自安世間何處無顛崖不復據鼎耳擾其寤夢也行人  
歸促復草草附上卽端日奉候興居未悉二月二十四日道周頓  
首頓首

與黃東崖相國書

拜七月三山歸所惠書令人感歎今諸舌戰想少憇然亦無著手  
處綿蕞之前合有此事無足多怪但括江淮以奠四帥雞鴨已盡  
飽鷹難飛前無可進後無所處數月以後將復如何山陵松楸在  
入掌中異時慘括復何所極諸山陵使能遂了此乎四帥分江一  
左擅湖我輩無一旅能舉其事消萌建威徒恃一史道鄰是夫子  
乾坤正氣集

卷五百十六

八

所歎才難也周病甚素空疏加以健忘見張問李唯坐江邊看兒  
童竹弓射鴨爲樂耳桑梓又多事諸招撫者日譏言句引愚罔稍  
稍正之則騰謗四起幾不可聞世運否泰則亦天也人柰之何塵  
界中著百里百里中著七尺稍費經營愈碎愈細正復歎氣伸足  
詠彼蒼華耳姜燕老想無歸里行望閣下匡持新命貽我安席也

與黃東崖相國書

得若椰書乃知台翁入直甚喜機絲方婪賴天孫整之不獨星序  
有光草野餘生亦藉還耕鑿也吳會未收中原無路新安旣陷南  
紀垂絕雖樂葛處此不能緩其裘帶而使弟酸腐書生理之命是  
搏兔古人所爲笑談也收人才練軍實是今日要緊而纒破以後  
人情太乖昔日所謂豪傑皆不可復仗吾土軍實盡入滎陽不肯  
孤身碎掌所招踰四千人殄風吸露以効忠義明旨亦云就廣信

支餉而信州士民盡室入山府縣催科徒有仰屋捐助二三千又當與信撫施軍三股分用肘踵俱決爲之奈何今粵中踰賦見有二十四萬吾出勸助亦十餘萬分其涓灑足佐月糈而委之養威不卹枵復雖有喬松之術難盡授於熊羆矣月前見明旨已以關外重鉞寄曾二老此駕馭英雄收拾孤老第一善著而旋又反汗何也仇仇不力退遂難詳將使不肖何以自處將士旣知無權則輕玩以生讐敵又知無餉則禍敗立至此二者在不肖受之不妨亦奈何令宗社受之乎朝無正論人皆養交明堂之義揚薪愈沸不知桑梓竟當如何也軍中監紀趙士超爲其父請補金吾此志士也幸炤察之小至日道周頓首

與黃東崖相國書

東崖先生秉鈞甚善使弟得有首邱之所亦爲邊疆蚤得綢繆今

乾坤正氣集

卷五百六

九

日事勢比之五月十倍艱難五月祇苦無君今日幾苦無民不獨無民且苦無國弟之區區豈薄叔度而師文淵者垂老未死恐及披髮之事耳今廣信以北七八十里卽爲異域弟提數旅手揮空拳以控鐵騎癡童之扼虎亦各其志也而徽州狂叫之士日生異說奸細出入牟在軍中今日不去卽馬革裹尸亦不可得耳四千之卒以四分之兩在休婆一在饒撫今休婆者挫損幾半區區軍中僅千餘人而口騎千數逼於肩背不知朝廷何以籌之弟爲前茅列頸之士屬觀易動想定虜乘之可奏奇勲耳出關已踰月于鬢稍來常恐吾創之多賴吾兄持之得入大安關卽爲厚幸不想鳳輝堂也草草原諒不悉長至後二日道周頓首

與黃東崖相國書

前兩書達合翁想已目及弟絕口不道功名獨以初入關時與朝

廷議置行在於信衢二州時人祇知有衢以信爲江右了不著口  
爲弟迂濶也弟竭力明廣信爲全閩肩背僅有此一重藩籬比衢  
有兩倍得力是以不憚區區致力於此至信乃知徽州距此祇隔  
一嶺有四路相通覺前言之未盡耳吾鄉人慣走金衢但稱金衢  
其實要害全在廣信也永豐有詹自如兆垣俞墨華二父母皆可  
借重料理本處兵餉又鄭父母汝說徐進士敬時皆實心體國者  
今朝廷動以臺省獎勞人才至於要緊所在全不著意萬一破壞  
悔之晚矣弟五千之卒以二千餉於休婺二縣雖不大潰已損二  
三百人又千二百少挫於瑞洪亦損七八十人雖殺傷畧相當而  
無大破軍士不大走獨牛明山四十級爲對敵所得而談者又云  
不真一身無據十口難分進退趨趨而軍士之情散矣左右獵狝  
日以阻撓爲事散掠人財而歸惡於民高坐不出而笑罵相嗤前  
乾坤正氣集

卷五百十六

十

自十月初九師休婺之口踰四十日乃有旗鼓相及雖有能羶化  
爲鼯鼠矣見二老代理之命權威不勝而今又杳然不知何日得  
還清源與素庵諸兄再啜勺泉坐竹偕亭之上也○破徽後諸軍  
漏言弟欲出休婺遂併力於此前月廿旬以五百騎守婺我軍距  
海口去婺三十餘里稍爲之防至冬至會節寅夜劫營遂爲所躡  
兩營俱散賴弟所募樂平兵至乃焚掠而去今初七八間又聞召  
杭騎數百來度信睦比隣其所必爭弟以孤軍四面牆壁雖咫尺  
其事無相援者逝不去此恐有林貞金聲之虞耳別軍去撫昌者  
已收拾安仁餘千上東鄉進賢掃金賊以朱序之業委之國土藉  
鍾篋之靈看蚤晚可收而樂平勁卒已搗休甯初九十間報大有  
斬獲然未敢信也弟孤踪獨手受兄翁知己之誼不□日夕憔悴  
不過代諸貴人捍禦耳初意亦謂貴人不出弟不敢安居今貴人

已出弟可以還矣古云太白不出星辰爲客今弟可爲主未也三月生一小兒呱呱未字家兄七十口懸弟歸山此情唯兄翁知之不武不文不進不退昔人所謂怪鳥也非獨怪之而又呆甚兄翁幸念我老六飛在建甯弟當入闕請候唯重慈不悉

寄家書

自還浙以來無日不思歸家展墓告祠以畢餘年而時事未定廟社未安桑梓與天下均未宥竊栖之日安敢與奔逃偷樂者共著邊鞭爲千古之所唾罵生平談禹稷不及顏子今日思蓬瑗賢管仲遠矣當此渙散之期無一番收拾雖吾鄉丘墓亦難安枕擬以七月廿三日出師倘有三千之士可以隨處鼓舞聯絡大江東西而日子迫近錢糧未措無一千家丁可先應手者路上夫價騰湧親朋不得往來吾鄉爲鄭家收盡則後事難圖眾力未集雖此處乾坤正氣集卷五百六 十一 黃九調募得一二千無益也蚤晚看黃明輔到可與共募能廓清吳會恢復孝陵卽長揖還山未爲晚耳

寄家書

去歲臘月十九日得解網至今歲正月杪始出都門想二月半間家中可知消息聖意無甚苛求而諸老苦不放手此自生命帶來於人何怨原稟烟瘴則在廣西地方便道至家而兵部必以酉陽相處謂酉陽武陵之傍郡意欲相難耳然武陵已死禍敗昭著朝廷公論久必自明吾至酉陽亦無終困之理家人切勿以此望於懷也吾從此便道亦可至家然一事未了終是懸懸非久遠出反自費心乃決意湖江西至武昌繳此衛案大抵至武昌繳文書身至酉陽不數月可借差還山耳此事如不明白自關國家事非獨吾身家之憂也諸說好話者皆大家寬慰之談不必聽之吾盡吾

道以俟論定閉戶著書儘可自老非必軒冕能解人懷也墓上諸石可擇日子平安一一除去每夢父母身未康甯開襟撫枕唯有悲歎卽欲改葬亦俟今秋吾自楚中東還也慶慶慶子讀書進益何如恨身不能跳至觀其峨誦當時令知伊父勞苦勿著采色勿作戲語勿輕跳與小人交處時時讀經典令知道理也吾最不喜人讀註子無益於事反多一倍工夫切宜省之如心事稍通可從叢書中取劉向說苑新序并韓詩外傳讀之可知故事又有文氣并讀左傳國語可通於春秋亦不至腐俗也

在徽州寄家書

三朝顛覆矣事宏光而宏光蒙塵奉潞藩而潞藩銜璧栖遲此身卽老死漏下有何顏面生平恥爲一節之士從此遂志亦無所恨但恐爲曾閔所笑耳爲子當孝爲臣當忠無所愧而已廿五日至

乾坤正氣集

卷五百十六

三

初三日發婺源初六日至新安欲往金陵當在五六日間此行洪亨九決不可與相見卽見亦無全理夷齊巢許之間吾知所處矣

與內書

此篇與洪氏刻本與內書第卅四篇大同小異。此本詳洪本畧。

思量住居只宜以墓下爲便漳中親戚難爲周旋俟吾解網入漳歡聚未遲耳歷來未有恩惠及於鄉人遇諸貧子可稍稍賑給云冬下送方先生八兩宣四兩或明年止用十二兩請恩宣兄弟有子所謂因不失其親者也前屢寄書欲璧謝諸贈惠而魏親翁又對客入京往還傳說深爲不便今對八百與吳郁卿納草尙二百在陳綠繩處欲盡寄盧丈還而行旅長途未免望慮能盡數璧還免使兒輩負仁義之債是吾所待以食寢也墓前享堂未可輕拆只前後牆基打除乾淨北白出門吾便可歸矣黃任買瓜再發二三金畀之恐春兩牆傾又費事也田尾小橋並遣人料理吾病體

已愈諸不盡言人參二兩付爺壹兩尹娘并查之

與內書

此篇亦已見洪氏刻本與內書但少起處五參以下十四字

五爹戊爹及時培植不及耑書大約吾病體已瘳看百日卽可行立如常傳言上一日問大璫云黃某外間人人推重是如何璫云它多讀書亦有操行是以人重之上云前日處他太重了又云上問黃某畢竟如何或云讀書不曉事耳上云此便是朽儒了大槪此後無復重處之意亦無復重處之理蹈仁不死是吾生平之所自信也前對聖主言東人必爭甯錦又言流寇必破夔門郾賊必入漢中今言言皆驗惜無有爲主上談之者主上止愛陳司馬至鄉貢一榜盡賜進士可歎今楚事大壞非臣子所樂談然楊司馬踪跡亦不能終結主知矣吾在此百事簡省冬春之間看有解網當攜子長登華首裁眉而歸子淵切不必來諸親戚並爲謝謝十乾坤正氣集卷五百六

三

月十日西庫書

家書

自去臘過北司今又六箇月備嘗諸苦念桑梓墳墓邈如天上賴天地祖宗之靈七尺尙存起居無恙子淵柴敬扶持朝夕勉強談笑以俟解網耳子長歸想已到家人尙未至京虜子虜子虜子大爺看管讀書識道理不昧忠孝大義足矣悠悠世道仰問彼蒼五月十六日在北司頓首

與倪文正公書

洪思曰甲申墓下乞休時

鴻寶年翁閣下往歲別剡溪時不知口躡畿南乃使兄獨賦無衣然弟亦已病如蛩蛩岬虛決非驂服之具又空拳握鐔無爲也比讀大疏所以仁義縉繡爲定命辰告者甚善當此仰屋浩歎之時

爲百年必世慮經權互宣中於腴理乃知劉東山林待用之賢非  
其至也蔣子卿一遇方歎遂奮驥步弟恐楮幣不足以當杜蘅也  
國僑有言亦聊云救耳海內人才沉毅雋傑唯有楊機部而縱之  
高蹈弟命奇窮久無意人世去臘出行江東與諸生鑿一鳥道徘徊  
之閒遂至失足直下懸崖二十餘仞幸得不死又與黃門北司  
同功樂正子春之所悲啼亦塞上老翁之所發祭也憶臨行時曾  
頌予誨云枕流漱石不如喫飯着衣今遂迷誤至此甯復有洗耳  
壺齒之樂乎蔣八翁嘗謂僕以酉運破月建恐不可支周亦以此  
沃意空山終尋君平之業但縣隻眼看鴻兄鐘鼎出於岱華之上  
耳今旣折肱終難叱馭而墓下風鶴日聞狼烽不絕若土山阿能  
屬固守已爲幸矣爲此力疾乞一休致政府書幸轉達之并道六  
十老翁三番不死亦無終日蹈焦原涉吕梁以爲快樂之事也病  
乾坤正氣集卷五百十六

古

脫不能多作揭并藉行人致銀臺司爲禱外附孝經大傳洪範明  
義二種請正正月穀日道周頓首

與倪文正公書

洪思曰癸未  
墓下乞休時

鴻寶年翁見報知始入都魚水之歡上慰宵旰口騎聞聲以次喙  
駭帷幄有人喜可知也去冬道病常恐不得至家及睹邱隴相望  
松楸始悟生還之恩隆於蕃錫草木狐兔俱監此心初夏來遂成  
怔忡耳眼昏沉神明漸廢又飢戎薦至婦子啼號南安之寇初平  
浦西之亂復作流賊焚掠去墓下不一二里中澤哀鴻遠依廬次  
瓶粟已罄頰飯難週康成之里無名孫期之鄉莫恃誼不敢舍邱  
隴以入城市不知過此將復安之也世業之人呼策草木無復動  
理不知當日田子春太史子義何以屢成壁壘行成騎伍巨靈之

手非復雞跖之所能模也姚二存後來之蒼氣誼最真依依於兄  
匪朝伊夕不知兄何以教之二存使來適賊稍退聊簡荒札情緒  
不倫聊鐫晶章紫帛二方附塵左右并問馮鄴兄起居如何八月  
八日道周頓首

答倪文正公書

洪思曰癸未  
墓下乞休時

鴻寶年翁九月初旬山中得讀大司徒諸疏渥咿者真婦人耳  
天下人材止有伯祥次則子子今乃使子卿先之愛騏驥者引譬  
於郭隗也弟抵家伏枕墓下蒸濕侵尋下部遂痿不任屈伸入秋  
胸膈大作痛倍於往年七月以來盜賊鴟張哀鴻嗷嗷幾使孫期  
不能保其豕圈鄭元無以安其唐肆去冬三疏已下皆不及知家  
僮回以八月十邊始抵廬次賊雖稍退而病殊劇便已絕意世途

章坤正氣集卷五百十六

五

銷聲隴首陳臥子乃兩書嘲讓曹遠思

鄭本作  
李寶方

至以爲偃蹇邱園

辭色俱厲如此穿衣喫飯再不由人枕石漱流亦無著處也世路  
卽不以廉恥待人君子當以廉恥自與厭浥之詩似爲道周發興  
耳飢戎之後茗華鮮飽遣人入都亦甚不易不獲已趣前僮再疏  
冀得一當終老林壑而已臨楮旁皇道周頓首

與蔣八公書

洪思曰癸未墓下乞休時  
洪本誤作與范文貞公書

去冬疏上已得溫綸而中外無知者信天末之遠也六月始見召  
對恭紀至八月家僮乃回接閣下書時敝鄉賊正嘯聚哀鴻嗷嗷  
周坐牀簀中與逃難餘黎相對唏噓真不知世上更有江淮充豫  
乃知身任四海者憂患更深耳八月後纔稍平鷹眼虎蹠不能盡  
變終當復來此時得保松楸爲耕鑿餘民秋毫皆閣下賜也自六

月杪不復出戶下體益委頓動轉不得帝與筮魂爲望已極諸悠  
悠者謂偃蹇邱園有乖臣誼以周之意老病殘軀終難報効但爲  
朝廷存禮義養廉恥使陛下無徇苟之人以此報効朝廷於臣誼  
無所闕者而談者又謂單薄徑遂無以結讒謗之舌自度生平與  
物無競諸睚眦者已見殛於明神伏辜於斧鉞今諸元老抱鏡當  
心總干山立甯復有得騁其說禮六十不就戎行明年是矣雖下  
愚無似亦欲掩關尋周孔之渺慮繹參軻之遺說卽使閣下哀其  
貧窮勉以榮藉然二人已矣雖列鐘鼎羅牲牲無所佐其匕箸古  
今賢達掩沒草莽者何限何必以無田不祭動其悲皇也周自審  
已定雋氣靈心妙才定志必屬倪鴻寶馮鄰仙二兄乘此雨隙脩  
葺東疆料理車營教練鬪士防東人之再逞專責巴蜀順勢以討  
荆郢循古者秦吳破郢之道陰移沓渚之舟師以奏長岸之偉畧  
乾坤正氣集卷五百十六

其

日道周頓首

與盧牧州書

間足下至浙東喜溢寤寐不獨聲氣可通亦形勢相起也會稽阻  
於長江欲取吳會非勾踐之志種蠡之力不足一騁要當選其精  
良西渡禹航從吉安廣德上殺鐘山猶或可及耳弟以空手呼兵  
呼餉於無人之野信州自聞徽破比屋入山無復雞犬索米一月  
不得千石供四五千人之食此外曠然量沙談梅無一是處足下  
擬過其倫又以非堪見薄近見曾二雲見代之旨體貌隆重如鴻  
易燕但不見下忽焉掣回想此危疆非人所樂芥橐駝載鹽車終

無交割之日也徽睦相連一重門限除是天下愚人負軛到此無由晤足下吐其伊鬱耳連日出師在婺源上下與□角逐雖破竹未成而迎刃將解不知海上長鬣誰當佐其短長者武人掉舌終是捉影捕風龍涎雖香要非朝餐所服矣以主上聖明羣賢畢力而獨令天子憂邊中原輿窳日尋被髮孔門三尺安得不道桓支乎粵中輸餉二十四萬福京自徵十餘萬而僕不得仰其涓滴安望復詣吳門問白虎之氣今亦當與吾鄉子弟撒手懸崖耳沈有蓀幸託宇下甚佳後來可與共濟敝門徒徐柏齡甚承盼睐業與一銜俾爲軍前措置些子儻得支持過歲亦是朝家之福不獨吾輩其襄大業也因風懷想不悉依依

答蔣若柳書

癸未乞休時

八月家僮歸乃得稽首讀相君書何垂念溝壑之深也自少疎逸乾坤正氣集

卷五百十六

七

魯尤日積腰領膚髮幾不能保幸藉相君覆蓋之恩吹其餘灰假以微息俾從狐兔歸首墓下又讀召對恭紀之文繆承颺言動明主之聽海內傳者謂一天雨露全爲枯芝此誼不聞亦數千載矣道周以孤貧殘生垂死而得之雖千鍾九鼎不爲過也欲於此外更盟起立譬隊葉之望寶珪朽株之希匠石不獨想念不生亦情理俱絕矣盜賊縱橫孤居墓下報人不知惜才改正之意反以逆旨繆誤見譏踴踏餘生唯有傷歎近以苟且撫定稍稍蘇魂問日邊之信存中澤之音欲再乞恩終老邱壑方今鴛鷺成羣驎騏溢歎卽欲擢筋洗髓勉自報効末由也矣自去冬歸臥墓下山氣蒸濕下體遂痿勉强扶筇不能出戶限霜蒲震柳重以斧柯雖灌以金液不能責其強立矣小疏委出至情幸相君垂惠俯悉彫殘萬

里離家動止不便容其待盡山下保此遺骸亦相君賜也草率空函謝謝九月六日道周頌首

答劉念臺書

洪思曰或疑作倪鴻寶  
癸未子在墓下乞休時

獻歲以來再拜教音百日之間風雲千變上載元微總非草莽之所與知講幄封疆諸臣不得不受其過唯藉兄及二三偉人剛柔微彰克鞏厥後耳周之薄劣先生所知遂初以來絕意人事不圖朽草化爲青螢三月展誦新詩諸肝鬲深痛者未嘗不頓足撫膺感而欲涕周四顧無徒誓形問影想亦海內之所共諒然天下事決非史魚於陵之所能了吾輩學問亦不宜以是自著也長孺元成之風自當以此還之言路必爲躍冶者開此不祥又軼然悔其多過矣自去歲十月以來低回二百日豈有他途沈吟自訝雖誦乾坤正氣集卷五十六

六

詩豁其心眸終復喟然長歎天下事自在偉人持要挈領讀書知言又在知人安民而上如舍周孔詩書而外別有神方是亦庸醫之所反走也吾鄉先輩經綸夙治又與兄晨夕上下魯陽之戈折筭相成弟以擊壤餘生仰慙古人近愧劉尹自寢處墓平以來兩膝重濕每值風雨將作輒大發悶時復刺痛不堪步趨雖荷殊思難於自奮周素不作假而世人恆以迂誕見督唯兄知之如使用輟柔翰能以強把大戟與假面抹額周旋則是可前也如猶書生者量已量世何可不蚤弟亦休矣

答劉念臺書二

洪思曰必癸未免  
戊歸江東開講時

斯道無限願力易窮至於暮年止得怡情山水誘進來人留些少清輝爲現前受用資後生探討耳伊川歸洛下元晦還西山其成

就與當年亦自不別晉人亦云祇有動靜之異原無優劣之分也  
先生道貫高堅非復前後敢望然云古來傑士磨頓之後鮮有樹  
立此田畫所進陳瑩中者恐元定晦翁聞之中卻耳君親之外唯  
有師友做鄉閭在天未模範難追又以老鈍蕭然自寘聞大教迫  
於警枕病驥扶鹽車不離鞭策亦頓蹄思起也前兩次寄扇頭凡  
七言八章想都見之嬰兒誠笑動成黃葉以爲俎豆則不可以佐  
長者捧腹則有餘也

答三忠端公書

洪思曰甲申  
墓下乞休時

尊五年翁冬仲從何元子處得拜手教天上貴人乃念窮交一至  
於此真可以塞破屋子也弟乖蹇自放無一足述而次公親造敝  
廬錫以言詠每讀其論著想其興懷晝夜味之河漢無極也弟病  
乾坤正氣集卷五百十六

九

廢已久僅以去夏稍蘇得一晤對過此遂頹唐不能出戶想念吾  
莆後來諸彥龍驥騫騰非復老馬所望亦樂一見之開其胸眸也  
天未間關遣使經年每發一緘頭鬚盡白天上蒼茫不分遠近但  
言萬里三月可度猶云牛女共在東河也去臘出行至江東登高  
送遠偶爾失足投空直下幸藉台庇頂踵俱全而神理摧積不可  
復藥至元正杉櫨猶未去手私念天意未嘗投艱而孟門太行無  
地不有世以敝屣相捐周亦以敝屣自命傀儡落線事事笑人想  
唯尊兄知己發其悲痛耳天下顛隤甚多匹夫納溝無盡周於其  
中猶之塵黍何足動達者言念乎語云鬼神有不護之身君相有  
不造之命僅以右手力疾草疏乞休年翁幸爲當道恣慰知九折  
之肱決難叱馭已溺之灰不復思然也秦蜀楚豫於人身有匍匐  
涉非棄置所當言亦非所當問悠悠鬱鬱俱託彼蒼耳穀曰道周

頓首

答趙景之書

向在靖海寺承賢郎過顧七尺玉立望而知其千里也是年芳蔭盡在桂林數問賢郎及陳明卿子無有晤者今又病絕尺一往來雖留子諸兄亦寥寥曠疏林下老生得與狐兔共尋邱隴自謂過矣新詩淵暢教誨殊深亦作八詩錄諸扇中骨節音響皆無一似正可發一竅也兵荒無措處遂借一封附虎尉者夫生平硜硜四壁自逸值大事輒縮手不知當日田子春太史子義何以召衆卻敵呼答如響正無奈何以匡坐彈琴消之凡古今卻掃彈琴者盡無聊賴非別有神智也一笑謝謝化州公文章政事驚人如許并與賢郎致聲謝謝無盡

獄中答盧雲際書

乾坤正氣集

卷五百十六

三

辭墓遂出門不及再奉慈誨想念長者循萬石之架蹈彥方之躅以師世淑人羽儀鄉里待時而動此樂何極古人云干將莫邪必有一缺蘇門柳下到處做人此刻鴟畫虎伏波所遺誠於子姓也舍生取義既無益於君虧體辱親徒有垂吾素耳雖云由命亦學問生疎之效也今兩月以來尙輾轉牀箠未能坐立視陰顧影日晷無多不知何時能反空山以畢學易之願北風時作鄭本作中夜泣然感念贈贖宏仁非誼所安已屢敕家人隨分拜壁而親朋未晤拮据爲煩猶享白魚以醇醪無濟於解網矣魏倩老何元兄想已出山諸親串悉惟致謝十月九日道周頓首

與張紹和書

兩載未能造候貧賤困人一至於此筆人持先生書還不見遇又失報問道周自分棄置唯汰沃能容之亦惟敢以此容於汰沃耳

按筆人以下至此鄭本作日對俗儒間舉業入之太習則太癡但適學周旋人日作拜晚久當見驢作吏見糞如糞也三十四字但  
冬涉春家遂不能具石稻婦當無種母當無裳登到虛無與天作  
岸如何如何少宰之喪不遂奔赴要以磨鏡非宜一縑難得兩足  
十寸僅能街頭日走二三十里過此以往未之或知桃花初脫窞  
下無人何處井上有一李半李可開枯咽除蟪李外又成鷺鳩欲  
託銜其甘根恆恐蹙然獨步而反也天地信太闊不審幾時行到  
芝山雲社臨風貢悵曷悉相思正月十八日道周頓首

### 與張紹和書

汰沃先生抵家既逾月周末候興居疎懶之病唯先生諒之也長  
日落落如棄世人未知世間更有何書可讀晉兄著作近幾多乃  
使弟不得領其毛羽遲候人漳先拜仰弓次脩元方之敬也薄儀  
少助劄劄奈何磨之寒冷良用自慙乃令人不敢與千秋之事見

### 乾坤正氣集卷五百十六

三

三月之外原封宛然便不敢再塵笥篋慈谿君並致意洪思日時  
助紹和刻七十二家紹和復書云承隆脫深感遠忱  
第世間無翰林先生持朱提贈人之事敬附壁返  
子奇刻資

### 與張紹和書

洪思日時紹和失  
桐子作書慰之

紹和先生聞有杵臼之慟自夏五而今遂近百日道周乃以伏兔  
窮猿自懷傷涕不得一望總帷灑此溯注如何如何紹和亦於世  
間取何等寶而爲造物之所靳吝冷月淒風不過欲聞幾痛句耳  
知先生不傷留許多年厚奉伯母安仁閒居之賦當不減於射雉  
也他人值此要亦常情僕嘗臥齋頭近千日盤盂半可勒銘而闕  
脫自遠誠慙於衷自盛伏渡海中感暑病風奄攝數十日初秋來  
浦又病肺言不可出欲作悲秋嘹唳之音誠非所長故甯爲空胸  
自鬱未解今先生之何如巨源識度蚤勝阮嵇但不知窺牖無人

而後能遂忘情否耳僕寡特餘生與六親澹泛自顧一身飄泊塵海獨居廬舍無似人聲動二三月如先生商音淒絃猶似爲有曲折如僕者嗷於廣野豈有人聽之者乎仰視雲樹消其寒風伏惟舒豁

與張紹和書

洪思曰時子奉旨將母歸家適紹和居武夷山中刻七十二家子過富沙不相聞知紹和遣人奉書來浦中

紹和先生手翰到甚悵恨作此草草不及問青谿之業致令猿鶴愁怨更何顏而談人間事乎周自去秋便杜門唯春前一出荷天地隆恩以通籍未久脫於增繳此時史方嚴而周冒昧獨請遂還山阿爲人臣子得此生成真不知骨血之爲吾有矣仁丈飄然決幾獨蚤覺林宗子龍猶有徘徊顧瞻之意此番出處當以足下屐齒印鎮一世無疑南大中丞晤之三山兩日之力僅一拜轅門乾坤正氣

卷五百十六

三

而去承惠口至極注存之感又以此得紹和動定萬里冷塵唯此半响稍親溫火過此復爲飄葉矣館席雖啟甚爲時輕有意思人切不欲就想弓甫知所自擇閭門晤文起文起亦多致意仁丈他貴人不易得晤晤亦不易啟齒落落石玉周與翁文素所相向也今人極難別識乃不如別識古人之樂周仲先如何品題當今周在吾家文強而下兄在申郭之間如此吾知免矣晉郎吾之肝膽何日復入懷中卒卒未申一候臨楮七魂俱往不悉媿負謝謝薄儀致上引意

與張紹和書

秋來稍近煙墨每一搦管唯聞猿嘯取凱甫行狀讀之增其酸楚耳臨於悲風擬作小傳於此取之今爲集引表碣遂泐莽別道一意不足以寫凱甫要令凱甫爲風吹其棘心也秋後當強步一訊

天柱之巔念凱南巖時雨落花飛猶在昨日不得不歎銷聲料人  
精意所屬定非悠悠者知不識山阮復當何如自凱甫沒後來彥  
淵嶽不得不歸謝瑟甫未知瑟甫可復往來乎

與張紹和書

洪思日時何喬遠上疏薦紹和爲預脩實錄奉旨部覆紹和時答書曰近所爲變籌出處期望變者過奢變年過三十便對人說鴻冥豈其雙鬢盡斑忽爾作雁鷺意萬萬無此不韻幸兄宜露此情使其知之

何光祿疏已下乃未悉君意嚮得戴觀察書亦云紹和仰視白日  
非遠柰何附入雲中僕意亦爾爾今想當置之也林宗伯晤中亦  
躊躇未可定欲俟君意詳議之大約草廬白沙不可偶紹和未應  
輕就人車命美神超鹿鹿猶自可紹和似當曠然僕入世來久益  
俗爲文法所繫想念碧梧青霜之下如三珠樹不可復憩

與張汰沃書

真跡補錄

乾坤正氣集

卷五百十六

三

汰沃先生時在南巖監舉往還無舟車之苦出從三洞入擁百城  
安石常云如此去夷齊何遠信然耳都門物候百倍異時樊籠之  
鳥又無水餌四顧毛羽何以能全□□據關內日益固雖鷲卻可  
導而批擣無人偷隙視陰不濡不熱自唐宋以來泄沓之態未有  
甚於今日者一番人馬百種元黃昔人借催官之符今日資餽案  
之手黼座既心薄外廷廷臣又不圖心競意氣既頹精神日靡而  
天子猶徒以文法督責之病鶴休糧求其飛舞豈可得乎小小兵  
譟輒戮撫臣不切工程動夷長者自今少年亦無復喜事之人驕  
兵終無可制之法目下事尙可爲而措置迂疏瞻言千里大臂之  
指責甚提刀一法之繩資其汲井良亦難矣夏至雖熱非□所憚  
大兵雖集未滿四五萬尙憤憤未有進取之策養之異時又成烏  
有不知冬下四體更如何耳登樓去梯爲策已遲辭幕依廬悔之

何及唯賢重萬福朱節庵恐已出不及寄意三華同此並荷千日  
朔後道周頌

與張汰沃書 真跡補錄

元正滯海外遙候興居想都清豫萬福弟遂患病疾右股作痛不  
便行立左臂亦悶麻如刺所少未聾盲耳口信比如何倩翁前寄  
來今又十日許臨德動靜甯可問否畚鍤又復來未能開筆晤時  
謝倩翁更遲報命也廿六日道周頌

寄家書 載湘管齋  
萬賞編

初入都時值去輔正逐人心翕然以爲天意已迴而武陵屢爲言  
者所侵主上自護其局八月初四日正當發刑部而先一日葉廷  
秀疏救請釋放及會議主上遂赫然後先子杖比來杖至六十者  
多斃此番三人皆藉廟社之靈得以不死今解石老葉潤老皆能  
草坤正氣集 卷五百十六

一函

稍行立吾雖在牀褥而元氣已復看九月終可曠履自在也此事  
聖賢所不經然亦不墜聖賢之路一時辛楚久覺泰然也嚴旨雖  
云依律而主上近有悔心吾今穆然應之畔美路絕不知何者爲  
法律何者爲囹圄蚤晚覓數部書再完前事今猶之墓下窮經耳  
墓前東後座拜亭令整齊作一橫牆遮拜亭前開門於夾屋中間  
北出諸舊門路及西邊牆基皆整齊平之無害也家人還住山中  
灑掃看兒子讀書勿以吾爲憂也

答葉文忠公書

洪思曰蓋葉相君向高也時黃子有母之喪水漿不入口  
者七日文忠公憂其柴毀也有書來弔作此爲誦附游支

提者  
往

二月望後人還致慈誨跪陳賜奠慟絕牀前某以草莽過承厚恩  
母子間關披暗日月生遂首邱之歡歿邀北牖之問誠不自圖膺

此齒遇某自早歲絕意寰中屢泛煙波尋死物表直以老母糠覈難終捉鼻孰人償此夙責於今已矣含暝之後敕斷水漿冀得悠然栢棧泉下七日不死迺復幸存今遂經年瓜李復及緬思在時板輿都下望老師之歸塵哀黃鳥之莫載入門對泣伏枕褰衣豈意歸來子舍未期成此窮鼠傷哉命也如死可贖人某必以半百之生代吾母大耋之命如死可再死吾母亦必以某代死之命贖諸賢者已死之生今乃令諸應生者皆死應死者猶生是某所七日而後以泣代漿者耳去冬師母歸塋某出哭已久而栢下風寒無有動理嘗望北斗禮此函丈近唯海氛日波月漲四壁之驅涸鮒相求錯底不存頰飯莫續中夜出墓噉然大號誠不如蚤歲豁然辭親離家孤泛烟水時之近於道也釋子干如將週支提附致謝謝並候與居萬福外繫晶章四事哀其貧薄道阻不躬

乾坤正氣集

卷五百十六

五

答鄭元岳書

拜書知吾師已至留都爲朝野私慶天子聖明以根本爲憂禹績自在豐芑何必宅揆乎周比苦未得歸誠不忍張目見諸邪僻與日月爭道天子明明以虞廷自將諸臣明明以斯高報上憶在嘉朝權璫操柄尙容七十餘疏颺廷乎號今乃以應詔求言之令爲監謗誅誅之律每念指摘浙事顛倒縱橫何異指鹿爲馬時乎標逆案以護逆案構科場以證科場如此心蹟嬰兒所知而常癡詫以爲三昧在先朝中不知何者爲比士君子讀書致身帷幄無攻擊搗鬪之難無騎虎難下之勢而一旦決裂遂至於此鄒智羅倫往蹟難追三百年讀書種子於是幾絕矣浙場論題只剖義利宗依堯舜引伸二程之論耳遂以爲怪僻不知天下明達者安所得不仁不義之言而稱之如此舉止是有宋諸奸所未敢遽下而今

皆明目張膽行之。良可痛心。周早歲學道廿七始就青衿於萬物無所憎惡。然既委質事主。不得談方外糠粃之論。今天子庶人一切以仁義堯舜爲邪說。則人心敗壞。何所底止。去歲南中臺省摘一學憲。此中無識。遂指以爲浙閩線索叢毒。百方周草野出山。誠不知人情傾險。一至於此。今惟有一去無所復關人事。但念聖天子英明沈毅。爲此輩所誤。使熙豐之事復見。今日早時輕詆子瞻。晦翁爲露圭角。今殊悔其痛哭。淡於賈生耳。秋中想可得歸。天子旣釋雲間。則來茲翼無他禍。猶恐諸無所釋憾者。以周爲狼毒之木耳。周病去不復挂口。老師子惟珍重。涵宥不悉。

答錢機山相公書

自垂翼于飛而後。天地日就崩頽。凌遲十年。遂無岸谷。雖云時會使然而奸回崇獎。黎老播棄。彼人爲之貽我君父。何可誣也。南遷乾坤正氣集卷五百十六

美

之倡方新當璧之檄。四播法旗。不舉義鼓。寂然鄭如水。湛定之量。短於用師。路皓月拓落之姿。猶堪鞭策。而相顧栖遲。謂江左之夷吾。辭中原之管葛。乎人心方窟。逢且則新。從來味氣。與新君更始。元良朝夕。正位留京。則禮樂典章。宜出先生之手。人心所係。旣旣以典側耳聽之。更脩孟卓之盟。扼越石之駕。湖流東上。劉賊必西。奔然後北。扼清河。西扼湖口。暫紓秦晉。徐收湖湘。進不失桓。劉退不失葛。蔣拔刀斫案。出輦畫圖。在於今日矣。誠使宗祏可鞏。必無五王之慮。若合哲人接履。猶有啞虎之嫌。草野啼噓。聞見不逮。河山脩阻。投袂莫從。望風慨然。啜其泣矣。某不勝臨楮悲痛之至。

答陳明卿書

明卿年翁三載契闊。而三接教音。幽人天未了。不能酬明卿呼吸。上逼聲名下。遍猶念南方菰蘆之下。有黃生者。北海之思。孝章扶

風之稱謝該亦以潤其齒牙非爲資其羽翮也天子聖明休風日  
扇圖治有漸爲政在人伐木之聽和平小明之與正直每告同志  
兩言而已前徐霞客來持素縑不之敢領瞻望神骨知爲異人夜  
關秉燭談鍾山採藥之幽聽雁湖縣緬之險如逢明卿啜茶天台  
勒銘雁宕恍惚魂交識於寤夢也廿年以來僅成一書聊資翫覆  
外唯加餐萬福有教不盡長至後道周頓首

與張湛虛書

湛虛年丈龍鴻襄天不忘魚鳥溫涼變序尙憶綈袍去歲秦厨之  
惠於今三年使我悅草之情重依覆被灰溺餘氣忽焉生煙溝壑  
斷姿居然賁績誰實爲之莫測化柄之心何以報者猶有同澤之  
意弟自起草以來藝松永矢嘗稱逸少之器十倍淵源舜卿之才  
萬分德遠將由深淺異量故舒卷殊方非謂宅平之勝於居險也

乾坤正氣集

卷五百十六

七

邇聞□警迫我京陵自省餘生誼難偃蹇遂以蛙蝨之氣謀及鳶  
旌馳驅之懷通於罔極輪蹄一動不可復迴顧念小山隈其泣矣  
杜翁云在山泉水清清則可鑒眉髮出山泉水濁濁則不見面目  
比來四旬始走三千餘里自顧面目不可復認甯當從年翁辨其  
纓足乎□□雖退鷺伏滋雄烟火初灰燕雀復集堂中湯藥非棄  
婦之所宜親厨下燎焚又非遠客之所及搏行行不已意欲何爲  
年翁想爲宜其驛霧也嚮在枌榆適聞司馬前命天下方注其雲  
霓今日需才倘有建牙來章甯可較其邊腹乎人心易散才且難  
求格心之業旣落空談輩後之圖尙資廣德屈指宇內心膽識量  
推我年翁智深勇沈有力有德過都歷塊似此無多年翁蚤晚趣  
裝弟當從之爲着鞭矣堯舜之朝叢求元凱一木大厦四顧誰鄰  
正恐萬里投身爲穿突之羽也歲序又更時數堪虞伏惟年翁爲

聖主蒼生千福珍重

與魏中嚴書

入都  
途中

前出山時姻翁有勸弟遲行之色真遠慮也弟以風濤無復甯理  
安枕頽流終覺未安草草動足遂兼壯罔之忌正不如吾姻翁識  
力福力坐鎮一世耳過鎮江東路似差可行然士紳共趨亦甚凋  
弊利國驛而上亦復如此云至此直則中貴怒馬日十百輩鞭撻  
所施不避甯越悠悠世界雕琢盡矣從江心望睢陽上下塵莽蕭  
然終日不見一騎便似絕域如此半年則南北形斷加以光固之  
間土寇見告壽潁之際勢無安臘瞻烏跂鹿我勞如何已一月不  
見報楊文弱儻奪情天下豈有人理劉念臺極得出處之正林紫  
濤脩邊疏尚未覆亦未審情形如何弟歲暮恐未得面恩決意得  
請不知何以報我親翁者徐孺之告林宗每懷勞念

乾坤正氣集

卷五百十六

天

與魏中嚴書

夏中得姻祖太夫人訃榮哀之懷忠孝之義在罔極中同此疚心  
而補哀言旋屬續視履非至性通冥有難得之君親者矣天祐格  
人誠孚粉社睠懷蒿蔚何能不悲每念先慈茹荼擁絮垂八十年  
不知鍾鼎的爲何物九原相遇雪涕如何弟守廬不終聞雞破戒  
移勒之痛甚於絕裾入夏以來追惟往蹠誠欲碎踵炙踝以答祖  
盟而身旣投籠烹割隨主髮膚身體無一爲親乃知閔騫在汶之  
義深於神禹也中原塗炭旣八九年哲匠括囊又非朝夕匡扶勝  
具唯有親臺而又遭回泮渙如此左史所譏長宏徐孺之戒林宗  
準其遺言不爲過矣上以誠求下以貌應巖廊邊圉一大戲場至  
於聖主之所注存則孟浪愈甚師錫鉅典遂成呼盧不知蒼生更  
何所繫屬含淚向別人正不如墓上自家發涕耳孫上苑沒羽於

漢陰薛韓城收功於副墨放狙方去蠅集又來加以義馭遶城軍  
容南討祁父藉此以奉爪牙司馬因之而生羽翼雖陳張斃於桁  
楊而烏巴留其梁笏終風又曠曷日霽清弟以狂瞽疾呼屢瀆不  
測恃有天子慈明寬其項領王餘半體之魚枯楊復生之稊戀戀  
感恩亦已末矣江淮稍靖決計賦歸晴乾淋頭度之已審想沃沃  
諸兄亦度其底此也擬作王母誄以荒拙未成輒爲四詩以當一  
慟并附絮炙先於束芻唯親翁諒其疎率也小疏草附請正不悉

與朱節庵書

節庵親家萬福屢蒙大教開發慰藉常有夜雨連牀之意弟之疏  
鄙兄所習知然自徑徑不解好醜四十嬰孩嬉笑膝下不知世間  
纒組的是何物而鄉里貴人強以是踟躕四月入京者造諸不根  
使人聞之憤悶欲絕此輩人只欲自作官耳何苦必以弟爲薦席  
乾坤正氣集 卷五百六 无

乃爾今春母子日夕依依想望家信不至而此輩突造蜚語迫弟  
爲不得不歸之勢嗚呼此人豈得爲仁者乎弟視一官輕於蟬翼  
但以老母遠來未能脫釋都門勉強栖遲視月如歲又生平讀書  
稍近甯澹豈爲腐鼠弄其齒牙而此輩識癡終有芥蒂弟亦當遠  
領空闊避其憎繳但四顧親友無一心期仰視明月下而顧影真  
不禁其蕭騷耳生平身名母子區區遠託聖賢近託足下何由促  
膝吐此言懷六月二日道周頓首

與朱節庵書

節庵姻翁道遠音稀殊懷勞想也別後甚欲歸棲遲於此遂復孟  
浪從人作兒童之事今已如此悔不可言想兄丈徐觀一二年然  
後搏飛利見免此目前危疑之苦爲樂無方嚮出場時人人欲歸  
既場後平復相安無事燕雀之識大率如此今漕河已涸流賊日

多涓涓不塞勢已襄陵當道諸賢總無有商量此事者不在不狃世上定無佳人兩口以來物情大變白馬之禍恐復生於今日邊鎮大臣不吐不下中閭執命勢不能及糧絕於河餼置於庾思東門之外青果乾蝦真如麟鳳之脯矣止爲一日混混從人取此二年月煩悶耳

答何元子書

別後奉手教得領易旨自非先生誰復憫其顛頓曲示繡引者生素疏迂晚益忽忽不能多蓄往懿推探奧義二十年來仰鑽義文一無所得每誦程河南傳序輒自興慨恐終窒於辭理也微言久絕天命先生總其條貫使羣儒裘帶有所領袖從來作者得其冠冕昔鄧汝極作訓自命爲翼迫於尼尊今先生作翼又名爲詒遠實逾於當陽矣中間采妙言斷辭要非王鄭之所希及至若洩渤

菴坤正氣集

卷五百十六

辛

附於山火隻言片羽頡頏殊前都自惡其白頭實無關於至理也周自焚視以來日就頑鈍又見書極少心眼不開少年常恨性靈不慧老來又苦學問無多不知捨此兩者更何處得到頭田地如要實落工夫從兩漢上泝杏壇猶齊魯之於燕市比於鷲城較近萬里矣每想先生坐開寶藏間出彳珠遇其得意真使紫陽諸公向門乞火如周者又何處獲其七箸乎遼環前實浪譚當塗所謂虛誕詠業又滋罪案知己所當瘞藏先生念其藍縷并覆露漿已爲厚幸奈何脩裸人之文繡颺渾沌以蛾眉乎吾鄉銅海困於紅巨上下喁喁仰彼鶡音狐兔餘生見人草伏時有知舊惠書一切以筆冢謝之獨於先生瞭然絕塵誦其書而輟嚶鳴疑自以爲不敢也草草布復并無敢候達者想自以情法之表廣錫善類也

與何元子書

洪思曰益出都  
往戌時所作也

藉庇姻翁得開一面猶以禦魅周此餘年誦候人之詩歌擊鼓之  
章未免慙其維咻歎此南行也票意在嶺西而典午竟置之西陽  
勾漏奇緣湘沅足樂從此便道似可省家而東風泝流西上武昌  
不以爲遠一以畏此簡書一以消此睥睨白首長征知骨肉之所  
與念也去秋聖主傳問念臺之清壯其之博以此開示綸扉無有  
應者閱數日銓部乃以銓貳副念臺元正上傳予師以爲可用亦  
無應者宜興乃尋以復官得請日月自是光華煙雲饒有籠絡某  
幸邀解網而雷霆餘音號號愁人去之經春猶有厲色不知此流  
復當何極也日者寬大漸開言路稍振起廢之旨再申請獄之音  
復見海內喁喁頌功陽羨實自聖主本懷非盡補煉之力也武陵  
去酉陽不三百里周挺身其間能無器之梅州之懼陽羨雅意勸  
乾坤正氣集卷五百十六

三

某徐行然臣子蹈赴無所復避庖厨懸命何獨五溪有此毒霧乎  
天下推轂東翁亦爲丹霞壯采漏濫之餘更爲得一吐氣天誅武  
陵帝亟韓城吾輩蕭然俛仰無負富有日新豈必繫於鼎足乎已  
南行亟當趨候杖履而啟處未遑情爲誼奪想親翁諒之蚤也三  
月朔後一日揚州解纜弟道周頓首

答夏彝仲書

彝仲別後杳然亦以主恩未報空山難臥而奇窮創出無一日得  
離牀蓐而顛墜傾覆隨之去臘試步江東失足懸崖輾轉三十仞  
遠邇觀者咸云糞粉適借兄庇正墜石灰窠中頂踵粗存而百節  
俱痛從此不樂問人間之事矣生平擇地急病讓夷而太行孟門  
隨地溷出去秋逃聽不知長安動靜亦復云何僕生平無競而吟  
聲未絕就陰減影吾人所師安能從軟香塵中辯洩渤之氣乎知

險知阻不出易簡之中多懼多凶亦在譽功之內唯有遜世聖人  
便宜太過今日使人悟嘉肥之晚也前疏奉旨後宜再請以道途  
遼闊徹鄉土寇縱橫不能應時而發恐當道以爲偃蹇今既手足  
拘繫動止不便安能以三折之臂謬附良醫乎長安聲息固非野  
史所敢問亦有老人所不可不知者瑗公幸稍示之外附孝經大  
傳洪範明義二部不盡言懷正月穀日道周頓首

### 答陳相公書

洪恩曰甲申正月  
在墓下乞休時也

去歲八月得拜閣下書欣慰不可言又得召對恭紀所推許誘掖  
非所敢望起枯迴生遠邇同歎以昭聖德傳之無窮非爲道周七  
尺斷溝朽株而已漳南天末魚雁不通自去歲秋前隔於□□秋  
後携於寇警道周居空山與狐兔同穴雖奉溫綸近一歲皆不可  
乾坤正氣集卷五百十六

三

聞知每遣一使動須經年發一空函頭鬚爲白去秋後又聞禁嚴  
拜疏邇迴而反今遂三年矣獻臘祖道出江東偶臨層崖持杯失  
足顛墜二十餘仞之下遠近聚觀以爲必無生理藉閣下之靈神  
力所護正當石灰中不成齏粉而左腕左足百節酸痛以杉櫛夾  
之逾月尙未能痊生命奇窮幸脫鼎鑊之下又羅溝壑之中皆千  
死而一生人理所不經涉諺云鬼神不護違時之身君相難造窮  
人之命豈其然乎匹夫納溝阿衡所歎以不肖顛頓如此宜亦有  
道仁人之所垂憫也方今豺狼載道豫楚秦蜀全藉鞏持至於敝  
鄉浸成焦爛歲月而後恐與江漢同波道周但仰抱松楸俯其餘  
黎號呼穹蒼稽首出血於斗極之下而已區區隻身無須他物但  
乞餘生得守邱墓而體受全歸未投魍魅之域皆相君之賜也萬  
里聞禁僅抵空函統惟覆蓋不悉瞻依道周頓首

答陳太史書

洪思曰癸未墓下乞休時

分榻以來遂五載此目在沙塵中無一日明淨終風之詩誦之潸然墓下未嘗見報時從諸生知其影響徒使頭髮朝夕自白耳兩歲前兄有書勸其栖遲不圖巨鱗困於香餌鴻寶雲儀又逢輕繳魑魅喜人過亦遂至此古人所以抱膝而歎也有鄒趙而開楊左之禍有文何而開陳鄭之憂安知賢者固不利人國乎每讀子瞻寄錢道人詩爲之中夜起而頓足卽不能負劍開梁以滌豫荆使吾黨發其醜顏亦奈何手扶鼎耳坐觀鸞孔雜於鴨臚乎嘉善想亦歸天下蒼生意當活於誰手明明天子不信詩書之效此數十年來講筵諸臣不得不任其過次乃邊圉諸臣耳一病當身百藥坐盡洩渤登筵則參苓灰死矣兄此時視僕猶有起色者乎墓下

乾坤正氣集

卷五百十六

三

蒸濕腰膝大痛每值風雨輒酸楚不勝自去歲承命半載矣作一草請告未能悠悠此情非傲非惰誰復知之者五月十日燈下道周復

答顧太史書

洪思曰甲申墓下乞休時

字兄蹈古之懷與匡時相資使聖明鑒其真醇友朋諒其惻素信獲之道可謂兼之每念曩時唯有興歎吾道屯亨雖係之天亦由乎人居平疏畧簡核不細涉學淺陋其用暗矣僕既肩戶以俟追討會不移時世事如是溝壑殘年誠不惜死所惜者與二季諸賢同歸覆轍耳雨雪雖消渾泥猶故塵霾四海無日清除兄方射隼高墉如使天欲治平王明并受則岡鳴梧音在兄赤烏之下矣藤八翁一再貽書皆不敢答自安腐朽不問星辰凡諸邸報海內動

靜一切付之飄風落葉耳小詩附去足抒微思洪範緇衣坊記三書請正謝謝無量二月七日道周頓首

答朱王孫書

洪思曰癸未墓下乞休時

老公祖植根天潢河酌行潦施其珠玉挹此葑菲信草野之耿光亦人倫之勝事也承示寶乘甚謝凡貞白著操當身皆不自知而傍觀者爲之贊揚稱道猶頌桂蠹於蓼蟲之前諛松筠於泉石之下無所動其感愴發其言笑也聞盱漢山川之奇萃於國會是以人文聿興貞良復出江南名由足跡欲滿恨未嘗探金精之隱棲訪麻姑之逸躡耳僕去楚歸遺疾右足偏痿又住墓下卑濕自五月以來遂不能踰戶唯右手尙動勉供酬應過此亦恐不能如前近又惡聞人聲已四五十日徹夜不寐以此盡屏思慮轉面暗乾坤正氣集卷五百十六

書

壁教至不敢不答力疾鳴謝不悉所懷

答陳御史書

洪思曰癸未墓下乞休時

匡扶之業須藉偉人鐘鼎之勲全資名世當此海內焦乾衝嵩板蕩顧諸書生袖手無一籌一畫能紆明主之憂釋蒼生之負者乃知士市魚鹽之爲絕德也先生應時而起上眷獨深攬轡舉帷澄清萬里其於撥亂支傾憂盛明危之畧嘗之熟矣僕溝中之瘠泥蛆餘生俯仰上下流覽古今未有迂枯顛頓不自隕絕尙苟且蒙而有如僕今日者幸得藉桑梓餘陰偷賢宰執之庇俾保首須終老牖下已爲過矣豈敢復盼澠池之收起病類以辱履乘乎去冬兩疏雖奉溫綸而天末雁稀邸報不至傳者紛紛夏秋之間猶云述誤致駁爲談者之所鄙笑至八月家僮始歸乃覩頭末九月欲

脩小疏堅乞休致而家貧僕方遍求急足無官應者欲託當道代題而枯腐餘年往來絕寡又云從無此例亦已矣折臂螳螂何干轍迹乾頤蛙黷無意鼓吹朝家卽不以廉恥待人臣子亦當以廉恥自厲先生方秉貞論正色朝端當博求練達之才以削平寇攘匡我王國如周者裘葛寒暑之不能謀安能投袂應節微聲而赴會乎聖天子仁覆遐陬羣公恩及螻類得以狐兔餘息歸首邱隴拜賜多矣里門嘯聚日以益繁墓下廬居豺虎所嚙毋望松楸徒有悲涕此時猶談出山真情理所不至倫類所未許也欲草小疏附上復以迂疏自輟知託華廈者不變色於若風也長至後一日道周頓首

杖後與甘御史書

負慝山居謝絕人事誠虞有不測之威被於草莽而風霆陡發掩乾坤正氣集

卷五百十六

三

耳莫及親翁驅車俯唁而某以擔簦就道西度漳關矣夏中三輔迸去時兆欲清而長壽發機早予於毒明廷召對詹翰四十餘人無發聲者覆盆之竟遂不可解今雖韓城禍敗勢共推頽而朝事日殊要非盛時之所宜有也楚寇爛於秦蜀獻賊已入漢中又出破成都聖主赫然爲誅熊督逮邵撫終未有益於殿最者大厦將傾東蒿作棟微親翁誰爲支其隆楨乎某病七十日瘡面稍平猶未能行立欲俟百日自發一疏而談者謂某罪狀盡在御前不須自白四顧親朋寥落晨星無相及者要當寂然聽之元穆耳嘉惠悉當奉璧頃當再報不盡

答吳源長少參書

洪思曰癸未墓下乞休時

天下之可恥者二無功而享大奉不救而視傾危此兩者時論不

過寤夢亦不過易之所謂吝也可歎者二機失而不可收時過而不可謀此兩者進退無地嗟悼莫及易之所謂悔也悔吝當中人鬼其咎雖有高官大爵猶黏黏蚌殼於巖石之上積厚薪於曲突之間豈足爲君子所過問有道所侈談乎祖臺下車而逢寇攘黎獻洵洵指顧之間讎渠執醜原隰既平泉流既清乃絕口讓功退居樹後而手執魁柄者低昂其間奪我慈父置於遐方亦衾影所不吝四顧而無悔也今苞孽未消將復尋其斧斯加以殄滅亦非有道所樂談君子所再問也祖臺家有竹林巾車孤舟出門臨江無所不樂卽不然一度嶺觀西粵之奇峯然後夸猶以望旂常於吾黨所瞻依先人所期可亦未甚遠也僕病人也自五月以來足不出戶限日食三錢梔子豈可通書到長安而并研書未復欲再乞休致免諸是非承來教云云則亦如楓落梧飄無言自化耳讀書

乾坤正氣集 卷五百十六

三美

五十年樹劍山刀無所不歷安能復商黜語之事見石獅眼而移家者後也南中諸友如某瞻山詹月如去歲流殍藉其支持今年鄉關并資扞掇如此事業賢於辛輔遠矣張司馬澹虛當急難時周郵家人踰於骨肉賂時辛寄謝謝各附兩扇頭去蕭條四壁無物可將想諸老亦能諒之也石城諸兄無由汎寄不任思存十月十一日道周頌首

與吳少參書

洪思曰答吳嘉禎爲  
興泉道黃子門人

承慈誨及示邸報知垂念深至及憫世之深周今已矣雖康途砥平無復策蹇之處幸爲狐兔歸命邱隴他又何知焉中和建極此義雖迂實亦棄之不得四方艱難人才垂盡何者可紓當宁之憤詩云謀臧不從不臧復用天下遂乏臧謀者乎巴縣恐是首揆接

爾欲肩樞輔之任世道傾危虜功難奏綿竹之業禪於蜀南偵藪折輔乃有豈其後者如今日卽不巴縣安可下手也山陰以闕迂見放猶臣子所安古云無不是底父母天下毒痛如此豈賢人完穩之日也生逢不辰當此際矣往歲出山濡滯清源與曾二雲揚扈於上蔣若椰鬪述於下條忽八載唯有感歎今四海蝸蟻非芻蕘禮樂之秋也前表草率急就殊不可觀若再書便當改作泉中多佳書尙遲日脩飾以進謝謝不勝上巳日道周頓首

與張湛虛中丞書

壬午二月別兄於雙荷庵爾時箴魂未與顧影驚弦遠望長途慨其歎矣十月九江始聞環命栖遲江渚侵臘抵家入門拭淚乃知兄垂念之殷所以周生備死雖刳宅分哺不以爲過長安諸老每談兄至性發於匪夷揮涕感哀無言不疾以蠖螟微生菌枯其盡乾坤正氣集卷五百十六

毛

而使長者發其精誠賢人生其悲宅卽起骨還肉不爲遠矣海表孤生四顧無徒知已一人自以爲足比雖屢荷趨命而折摺之軀形神不屬淒風苦雨酸楚莫勝橫草枕戈之意入老已衰補過益愈之情捫心俱絕譬之豚魚脫庖墜波又焉能念主人之夕食上客之朝饌乎今日度非中立起於淮蔡希文出於延安朝攜獻頭暮齎闕首必無以上慰主心少平神憤吾儕草野量腹度形一石一松受恩已極開濟之業匪我仁兄又誰望乎區區之情聊寄小詩空函附致曷悉勞馳十月十一日道周頓首

答蕭中丞書

洪思曰壬午墓下乞休時

老祖臺垂念深至自往歲開關而後覆被彌宏情誼加篤馮鄴兄翰旋於中老祖臺扶植於外是以獲起白骨再飭毛羽轉漚壑之

餘生從狐兔於邱首也今春得荷解澤卽已謝人事不睹邸報不接書問不近縉紳誓與魚蝦鹿豕爲伍知老祖臺於符檄交馳時亦想松濤雲樹鶯簧蛩吹之爲樂也勲名自天鐘鼎由命周已矣萬死一生脫於時賢之手中夜拊心尤悔叢集爲遠媿古人上勲明主而泰運未回尙勤宵旰口寇將合輦轂寒心所謂駢驥服之解腕泰越望而卻步者閩南疥癬無當痛痒而當事引爲瑕疵過矣過矣周以黔婁之骨附林類之皮苟免朝夕爲願已奢墓前數瓦爲風雷所碎今藉若椰諸老當務親賢方將寤夢以求管蕭入山而蒐頰牧寧當涸舉親朋相爲唇舌於老祖臺之前乎閏月十九日倪鴻兄間已提旅入援吾鄉與頌表遂絕無衣之篇此非草野之所敢問然使元黃見血魚鳥安棲亦漱流枕石者所望而顛倒也閩海宴清天鑒自朗蛙蟲小閑何礙風雲謹致加餐謝謝無

乾坤正氣集卷五百十六

三

量臘月道周頌首

與沈令書

黃子門人

湖上山中雖不及晤然知是兄相念之至歸論家中乃知辛巳承遠惠不以生死移志比從漳平父母處拜兄書知日蔣莅三山以是兄澹寗攻苦如此尙以禮樂丹青藻飾斷溝不已過乎中原淪喪玉石共焚兄乃得保球琳徐收桑榆之照非天祐尙賢神司報善不至此僕病創已極又在墓下水濕下體酸痛倚筇不能出戶編思曩日與二三兄弟探陰壑陟危巒下呼隱豹上捫飛鳥今遂拳然伏枕成隔世之事矣敝里南靖詔安皆蚤晚望得好人布其愷澤雖盜賊漸繁而耘鋤可及能得廉平如兄者洵酌所由歌也曠當晤沈公祖必有一當以報蒼生亦吾徒之福也謹附謝謝三

月二日道周頌首

答張恭錫書

洪思曰名晉徵字恭錫黃子  
門人癸未子在墓下乞休時

垂翼食報貽之上蒼收於吉人總非言語所整要知敬緝使神聽  
分其和平耳去歲入西陵時承諸兄所顧念匪朝伊夕亦難消受  
僕以疏牽之身享此綢繆常恐譽過咎生元澹之中錄其疵累也  
世道悲皇人才枯竭□□之禍一遂至此今當四海憔悴之時得  
一身榮暢動作如願則不謂身與世繫道與命關者矣江嶺上下  
風鶴不搖衣冠翱翔無異曩日而僕旣折其體膚備諸荼苦如此  
乖違又不在山川之限今雖倚筇能起眼食如故而血氣旣衰神  
明棄舍得荷主恩守此廬次使松鹿不犯烏兔相依自爲過矣  
復俯道與達人往來而進有乞音退生驕色哉天下相知實少沒  
在地下猶得與奚向動問豹嫖周旋真無意人世之事也便當更  
乾坤正氣集卷五百十六

三

悉以俟來鴻謝謝五月望日道周頓首

與沈令書

洪思曰癸未  
墓下乞休時

父母制令者也子弟奉令者也如田賦之法不失古意欲行則行  
之誰敢柄鑿齟齬者紛紛所云深用戒心然邱隴在此無所避之  
溝壑餘年誠恐不得堅臥爲執事憂如得松楸無恙枕漱不驚甯  
非厚福僕區區守墓於世上事不得仰攀唯見從來兵革倥偬時  
士民紳弁多有詬誅亦時勢使然物情難怪問巷間有不相諒者  
亦當以強忍持之卽云僕不養兵不與人勦議事無損也邇臺精  
心密運造福無窮寬綽調度與諸老商度應變多方如僕酸腐但  
藉覆幬不至展轉足矣地方多故不一晤鄉里先生而數以空函  
煩執事亦理路未安幸謝諸鄉里先生云眞病眞暗聾者勿與

人事也

答張御史書

洪思曰蓋張若仲字次巒與兄若化蒼巒皆黃子門人  
後退居丹山之陰海內謂之二張癸未子在北山時

往在都下未有以報也抵家不數月寵問隆施又儼然臨之自非  
骨肉誰復不我遐棄者除前始至墓下入春遂患痺兩足垂攣動  
借藤筇之力秋來作劇困於牀簀者幾閱月至今蚩然啟免之期  
恐遂近矣仁兄聲實並茂綢繆陰雨之先使河朔無事太行晏清  
西顧之所乃瞻也流寇聲息比復何如居園驛騷吾徒不得不任  
其責僕幸得脫然保有松石一切動靜膠目塞耳惟冀仁兄毅然  
紆宵衣暮袴之願耳使行草草四壁無可致意者唯小詩四章侑  
以七箸仰祝加餐努力千福七月廿日道周頓首

與張御史書

乾坤正氣集

卷五百十六

洪思曰將  
出京師時

甲

春間備領盛雅時以纂述經書未遑報章至今耿耿兄才具足了  
百人不自藉兄聳其鬚眉耳古之有道者不樂以一節自見雖忠  
孝亦不樂居其名不願有其事今乃不幸破綻於此程伯淳生平  
不喜孟子蓋虞千莫之多缺折也其實行廢均之有命僕再出山  
再遭顛頓豈有意爲此然於此毀斂一分便覺道力衰薄無當於  
用宛鳩小明兩義互發耳兄湛觀遐矚尙不以爲礙也澤蒲相去  
幾何是皆聖賢之都天下要會前日僕欲至秦蜀取道五臺瞰二  
室一躋華首望終南太白而還今又碌碌與匡廬從事遂使半百  
之年不知古長安是何方幅可歎也潘蒲州縵密和粹與商關河  
之業自是蒼生有幸是僕所藉榮施也幸爲謝之南北遠遠鱗羽  
間稀所相望者唯爲朝廷努力子惠窮民權貴之間唯以至誠格

之豚魚有孚何况吾羣僕已草草東裝就道空函致上不悉願言

答鄭牧仲書

牧仲先生頂得兄及叔祁兄書使人慙愧欲拔白髮以進青雲之末所稱未墜在茲之業要亦二三兄弟有志之所共獎非周朽腐所敢與聞矣周少無牧仲叔祁之才又無牧仲叔祁之志乖老等於牆面令生蚤數十年與諸兄切磋攝召今古集於斗極深藏遠待其所成就必有可觀而今已矣卽不幸蚤晚卒業風露何敢長揖以見游夏且無論姬孔之前矣王文中造就未宏遭時衰亂然猶奔走上下受書於李育問詩於夏璵考易於闕子明正樂於霍汲而周欲以區區單門獨戶坐臻富美不待高賢窺其內淺也孔門諸子各有所長因循增積終於高大而周以穉穉實倉瓦礫補嶽源瀾既雜蛆蚓同游令先數十年與諸兄翱翔開其眼翬差免

乾坤正氣集

卷五百十六

聖

諸累耳漢宋諸儒途徑稍分不離博約二路博不墜於詞章約不入於老釋雖使董劉俱躋明堂朱陸同登道岸未爲過也凡人生病痛皆不在博約分途儒墨互分只是割不得利祿二字割得利祿兩字卽與姬孔周旋雖不同堂依然隔壁耳洞璣是僕十年前之業切不須觀浦中諸兄近日料理孝經洪範差可寓目來書所云春秋訂說必有深義跋子見之數年前亦作此說比於坊記表記中畧詳其目臘月亦可登木大抵此道皆不宜刊布刊布近名講論近質但近名之災及於梨棗近質之災及於體膚要使眼見牆壁有無限文字亦不妨與後世質其短長耳謝兄近想佳別後有林衡兄敦實劉當之藻斐然未見知於當世兄幸獎勸之甫卽多賢留此躍其隱光王長公承惠書見候未能謝之又病久不能

云序于祈耐悉

答曾叔祁書

叔祁先生惠來書惶悚不堪時寒風也披詞之餘幾至汗出周實  
衰頓顛墜已深秉燭無及思與一世英賢仰鑽斯文是以一再出  
山僻躑道踏泳之源之未見其人幸有一二俊傑燥濕相就亦不  
過擄藻揚芬以爲文章廉隅如此而已誠使天下俊傑皆近文章  
砥礪廉隅入闇不疑蹈險無悔亦於周孔意思領畧三分而內錮  
於習染外撼於禍患求其博約終始弗畔未之有也周之少也溺  
於騷雅比其稍長濫於老釋旣四十餘乃知文藻之隆華與二氏  
之落穉一意反於六經然而老矣又性蕩佚易簡不能爲鎮坐靜  
觀含礫張鐵之事是以與奮無功疑信各半先生起於名家年未  
三十已登富有之堂探精微之室俯視周輩窮極乃反猶羲馭之  
於雞栖也來書所云漢諸君子殺馬樵蘇以求聞獲蓋其時經書  
乾坤正氣集卷五百十六

望

未出師述纂鮮今世典藉盡在坊間秘書枯於册府人自得師家  
爲明述有執經而遵孫或之畦買廬以依張饒之室亦人指爲黨  
阿衆誅其狂惑矣先乘深愧不能鬪揚竚望長脩早紹前業要之  
出處各有時候非如道力可一往奏功也儼帚安可再享豈得當  
寒表其絺衿乎幸收藏之間有未錄者從諸友乞得本附政小詩  
附卷頭去竭日呻吟不離蟪蛄亦騷雅之殘波鉛華之菟積也百  
雜謝謝不罄所懷

與王伯雲書

前後所得伯雲詩幾二十章球琳火齊滿於屋壁寶盈鬼橈宜其  
窮也病廢旣不能作詩又觀青細而捐兔册笙簧之下無所容其  
蛙鼓以犬馬殘年博副憲公佳詠及此十章幾直一死所不敢屬  
和者非直塵見亦揆才度質安於固陋想高曠之所涵覆也謝謝

二月十日道周頓首

與張公亮書

以僕意爲公亮主人無如陳雪灘者雪灘一榻蕭然但以吾黨集聚筆硯無恙便爲佳况禰正平雖輕薄然不從荀文若陳長文游亦未爲過傲也

答陳臥子書

洪思曰臥子名子龍華亭人黃子門人癸未子在北山時

遠使垂念萬里外未忘一日自惟疎陋荒遐之餘伏枕偷生兄方匡襄居園拯蒼生於塗炭慰明主於宵衣與二三君子渙羣戒萃克詰無遑僕亦視中原底清以收泉石之福安敢以鱗羽長途仰累足下哉前得吳生書知足下相念深至比接沈甯陵教所仰藉宏庇者真若孩提之於襁褓想足下攬轡澄清之風與隨車滂沱

乾坤正氣集

卷五百十六

望

之澤足相映也文卷清新讀之喜愧交并僕病體已廢兩膝將頽藉筇而起遠視匡雲邈若天上自念首邱不違先隴得以遺骸近託松楸已爲過矣兄清真卓朗和有節廉而不刻朝家寄賴斯道所爲鎮甕僕既猥落餘波溷人及門諸生出處可見兄善自寶重勿以賤鄙爲念努力報主加餐千萬賜米委不敢拜而道遠阻脩使人劬勞四壁之間無可爲答謹空函致謝不悉旁皇夏五道周頓首

答陳臥子書

四月拜上已書草草未有以報也此間天未真成醞雞近旨如何亦無由見之但聞兩都告急江右調危近云口已出口果否倪鴻寶馮鄴仙諸老又如何會稽歸而蜀川出此世道當然何足爲怪賢哲完身勞人馳騫天寶雙成不爲錯也僕比益病劣左臂偏枯

右脇驟痛黃鴨飛鳴眞無復江湖之夢望世稍清平得收學壤之樂耳沈天目極明爽留意斯道時相聞幸寄空函書抵千金不爲訛也易象正完幸一册來四月望日道周謝

獄中答張曷之

曷之天心遂不可問正當睨雪灑流之期又有風霆辟歷之異雖荼毒發於司馬亦銷鑠積於多時矣陋巷獨樂顏子所私市上雅春申公未免常恐賢者聞之懈心志士因而輟業也六十日外瘡漸就平輾轉牀簀未能起立醫者云須百日聊俟之耳犴門之內不勝深山箕文之所留心正可卒業而神爽久衰葦草繫念每聞此風亦擁衾以悲吟擲筆而長歎也前刻儒行緇衣深費精物今又不知洪範月令所在四小序草草者幸覓存之以俟來日成仁未殺身著書未絕筆雖敗鳳猶麟未改其樂也聞鄉里捐助者多乾坤正氣集卷五百十六

器

已救家人一一清理分還之

答陳獻可書

獻可先生僕談此道三十年今日乃聞獻可之言也湛心研慮冀一日升周孔之堂灑掃就事爲周孔斲養耳而獻可過相推信亦若謂當世無知僕如獻可者是僕之所循省浩歎也人讀書不能明悉不能與庸下之士其爲聽論乃使賢者一視而怪再視而棄終身崖然掩面不視此何所當於居業立誠莫猶有得者乎獻可獨由精入變不厭煩躋以沂易簡知此道之自然著察所難免尙欲十年卒業於此雖康成季通之用心豈復過此哉如獻可所云讀之而不能致功名隆聲譽美田宅裕允昆而猶且讀之者此眞迂愚吾輩所當共戒也僕爲此書尙十五卷談治亂之候帝王之紀依本圖象然論之招允正不如學庸語孟可以釋於元薰借於

大道也吾道所賴託於精心心地一塵百節俱落世謂覃精其蔽近愚仁而好學何愚之有縱令昏墜劣於射御但使來世不絕微言朝聞夕死吾猶甘之矣四顧廓然本雷已作釋孝云亡天下悠倏尊公自爲魯殿繹其緒論鼓吹風雅不足爲多獻可繼之慨然拔身依於聖地仰觀俯察流覽八荒似謂子雲平子不足兄事而獨留意儻忽之言自非孤身有翼誰復扶其俗筭開以日月者乎象休及洞璣式象繆假鄰光約其曠源猶存火影在僕書中愈分剩義在獻可集上自足孤行皇極圖韻包括宏微自視鈴所未窺沙隨所輟記僕自早歲亦嘗討論然在聲塵之間亦與博依俱謝矣堯夫拈韻極爲整齊夾深審聲徒來世詬苟可答於神明併可遺其舛瑩也來教云欲以今冬了授時厯此道極是中要近人欲舍授時遠依冲之分秒愈濶施用實難僕所積分在前書中僅表

乾坤正氣集

卷五百十六

璽

其一尙五六卷在軒筭圖中大約易象一十八變推五百一十四年分毫杪忽交會食差犁如晴日矣旣了授時再洞前書推算六十年中交會食差亦可不謬但以周孔爲師爰象爲準諸紛紛者如聚僮僕料理米鹽善成而收之綱領不在也古今讀書如劉子駿僧一行都有意思但不能精微堯夫初未嘗作厯元晦云堯夫作萬分厯行之苦難此殊疎忽無有也譽業得喪別自由天孟夫子云求之有道得之有命是求無益於得也僕自十九歲結東山裝初無當歲之慮碌碌知命出處之數併不繫心駢枝諸作亦在夙年終蒙世詆比盡脫落文章性命浩然冰釋所不自了祇謂發憤仰思忘憂忘老決不敢坦然安奉佛老之道耳吾徒心性端倪克治淨時與釋老不別所大差殊祇有此事範圍曲成不厭不倦死而後已知獻可眞成厲精上達亦意天下舍獻可無可與語及

此者前書畧律中尙爲刻者誤移一宮又畧分實測未定故不復寄此道得其大原了無艱澁悟積非積知變爲常一歸於天吾與獻可勉之更冀有得別證所聞道周臘月頓首

### 答洪尊光書

洪思曰黃子即病京師時之所作也丁丑五月附劉完公郵中歸

尊光兄遠別了無可致意唯念間關爲僕作苦嚶鳴之誼深於邱隅矣小草不可爲一木未能支回顧當時千九百悔南安翁蘇雲卿果是畸人讀書千卷不如翫易二爻是之謂也兩得書殊增契闊此間矮屋如駕漏舟棲遲半載欲歸不得擬上三四疏又以道命自我袋口而止吾黨讀書豎希孔遽便使朝廷不得其用鄒志完陳瑩中眞成日月也早中偶爲兩尙書請命僅得一司寇此自天子殊恩過此便有馮婦之朝然自忍耐不得冀秋間得歸杖履乾坤正氣集

### 卷五百十六

吳

相從聽新詩及諸親朋晤語何所不樂安能以身日嘗鼎鑊邪場前絕無彼信迫於衆議屈曲充數如祭芻狗行躒之矣端午前後病極困劉完公欲行留多日不可得以此不及致諸兄書病前分扇六把附去病中腕痛不盡云云

### 與洪尊光編問業修業書

甲戌

獻歲拜手教今兩月矣未獲報章唐伯玉行又未過從遂聆言候此時日事畚鍤科理墓下筆硯之務幾成河漢去歲修業皆未能點定又坐風雨中抱膝仰屋藉尊光畧爲點定便經平子矣如局此月決未清緒諸生來訂花朝之會甚切尊光幸爲諸兄道悉鄙懷謝謝前戴眉仲所錄出問業一卷已忘之矣尊光暇日可發古今疑義或一二十條爲問業補作六卷冀足之使得成片段耳亦佳事也

與洪尊光編修業問業書 乙亥

二月得徐晉斌唐伯玉書始知尊先有棘人之痛言念愴然此段是讀書第一苦情在罔極中撫膺共悼也僕日負土作不了事前欲屬兄點定脩業今不敢相煩大抵亦不須更易耳遲數日當秉燭了之聞兄柴毀幸善自寬僕自喪二人後未常以誕日近饋粥今年勉而對客亦自不得不爾尊光其節哀立身揚名顯親則自有日如尊光者撰述卓然已自不負宛鳩僕何敢貢其原菽乎小詩浪登絹素并小紙焚之知北橋先生總帷之上颯然神旨也尊光苦由唯自寬清明日道周頓首

與洪尊光編修業問業書 丙子

還山矣爲親朋強至海下今又欲至天寶卜兆遂不能一一候諸同志唯尊光道悉之也榕壇姓氏未行宜補云計問業二百六十  
乾坤正氣集 卷五百十六

望

五條十二萬一千七百二十四字日來紬繹蔣若柳序及拜高致便當坐臥其下矣步之殊不當下里草草附上用佐茶政耳山居方費畚鍤未遑趨冀與四伯道其謝意前諸生索一汪父母序僕至今茫然未有以應也又方有畚鍤之務幸假尊光餘力使僕蒙虎之反良爲厚幸矣修業序已寄張昂之處統俟鑑別

與洪尊光書

方與談 兀鼓掉江東尊光能往觀之乎想爾樹遲於南浦也道周頓首

又

數日從軍旅中來見新學乃得開眸也從二經精之聖人天道堂室若構十七元起辛未是表正之本兄遂坐而致之昨表記未尙未說出今坦然盡矣日軌月軌陽節陰節俱從此出世間祇有此

眞正學問不然虛度一生也其分秒便是損益進退三限五際三垣九野之所出入登雲漢而望星辰猶涉海之觀島嶼耳道周頓首

答洪尊光山居書 凡四

知尊光山居甚善春深得無蒸濕乎拜新詩如領松風也僕亦發籃輿來山阿月上得元對耳兄以此興復不淺諸峰之頂四眺極目良散人懷十七日道周謝

又

以尊光遠器而當昌時遽發其離騷乎空山了無所覩比來熟兄離騷乃稍稍開眼始知屈左徒之外別有一段情深理至之言宋西鄰輩祇可爲兄作奴也僕爨棘之音久已焚卻日在墓下一意灰稿以蚯蚓爲師每值秋風空對長松揮其酸涕耳道周頓首

乾坤正氣集 卷五百十六

哭

又

見報病益甚□□重飛大爲心痛正賴二祖功德未艾耳僕讀書五十年飢寒不死今多可十年飽煖何用鼓院紙錢宋人所爲歎也一官如落葉今但以鷗鳥視之來去不復經懷

又

接書殊爲惘然賈公深有意於斯文能相推轂必使尊光出山亦自盛事不知此事竟可行不此事始於宋家亦行得否然蹊徑多則營求衆非所以爲治也兄之委公足見深退矣賈公有晤煩爲言謝不盡

